



# KOPI PAHIT

**Nampaknya** tiap-tiap hampir tahun baharu Cina, perompak dan pencuri semakin ganas melakukan peranannya yang mudah mengambil harta benda orang. Penduduk-penduduk semuanya ketakutan dan kerana itu mereka tentu bertanya-tanya: Siapakah yang berkuasa di negeri ini? Pihak yang berkuasakah atau orang jahat? Jika pihak yang berkuasa mengapakah sentiasa berlaku kejadian-kejadian yang menakutkan rakyat jelata? Kerana itu orang ramai terhadap masalah ini berkehendakkan kerajaan berpendirian tegas supaya mengadakan undang-undang yang berat dan menyerikkan orang-orang yang merosakkan keamanan.

\* \* \*

Langkah yang dibuat oleh suatu badan yang diketuai oleh Tuan Bapa Peng Gek kerana mengadakan kelas-kelas malam untuk-untuk kanak-kanak yang lebih umur yang telah ditolak dari sekolah mesti disokong oleh kerajaan. Apakah akan jadi kepada kanak-kanak itu kalau tidak berpelajaran kelak? Jawabnya – jadi budak-budak jahat yang bersekolah daripada keadaan-keadaan jahat dan dari wayang-wayang gambar. Jadi “gangster” dan jadi pengukur jalan seperti yang kita lihat hari ini. Ini ialah seperkara besar yang patut diperhati bahawa jika kanak-kanak itu tidak terpimpin bermakna hidupnya tidak terjamin, dan apabila hidup tidak terjamin ertiinya campurannya tidak sempurna; dan apabila pergaulannya tidak sempurna maka akan menjadi orang jahat yang tidak tahu akan erti halal dan haram.

\* \* \*

Desakan Kesatuan Persekutuan Guru-guru Melayu Semenanjung supaya diadakan dengan segera sekolah-sekolah menengah

Melayu itu patutnya jangan dipandang sebagai suatu perkara yang jauh pandangannya. Selain daripada menuntut diadakan pelajaran-pelajaran untuk kanak-kanak Melayu bermakna juga menghendaki orang-orang Melayu kelak tidak menjadi orang-orang yang tidak berpelajaran dan akhirnya tidak tahu kadar dirinya. Kerana itu langkah-langkah menempelak sahaja dari atas itu tidak bijak tetapi sepatutnya dicari jalan bersama-sama kerana tidakkah di antara orang Melayu dengan orang Melayu itu yang dicari faedah untuk bangsanya lebih dahulu daripada faedah untuk orang lain?

\* \* \*

Kerajaan British nampaknya akan menguatkan lagi pangkalan pertahanannya di Singapura ini terutamanya setelah Ceylon menolak negerinya menjadi pangkalan lautnya. Kalau dengan kerajaan sekarang harus akan dapat bertolak ansur dalam hal ini tetapi bagaimanakah halnya nanti kalau sekiranya “Petir” menguasai kerajaan? Jawabnya akan kita lihat bersama-sama.

\* \* \*

Menteri Perusahaan, Tuan Jumbuhi menuduh: Modal-modal dalam negeri tidak mau menyokong usaha-usaha ini. Rupanya Tuan Jumbuhi sekarang faham bahawa di Singapura kalau tidak ada modal perusahaan kurang maju tetapi ia dan “kawan-kawannya” di pihak lain lupa pula bahawa peraturan-peraturan buruh yang berat telah diadakan sehingga orang sekarang berpendapat lebih baik jangan mengadakan usaha kerana usaha itu bukannya membawa faedah tetapi sebaliknya kerana ia semata-mata menguntungkan buruh-buruh sahaja – sedang “taukeh” pening kepala dibuatnya. Kerana itu janganlah selalu berat sebelah, hal-hal taukeh kecil juga perlu difikirkan dengan peraturan-peraturan buruh yang keras itu sehingga orang sekarang mencari jalan supaya jangan ada lebih buruh yang ditanggungnya di dalam pejabatnya – Cemeti al-Farouk.